

SA's Leading Past Year

Exam Paper Portal



You have Downloaded, yet Another Great Resource to assist you with your Studies 😊

Thank You for Supporting SA Exam Papers

Your Leading Past Year Exam Paper Resource Portal

Visit us @ www.saexampapers.co.za





basic education

Department:
Basic Education
REPUBLIC OF SOUTH AFRICA

SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS

SISWATI LULWIMI LWASEKHAYA (HL)

LIPHEPHA LEKUCALA (P1)

2023

EMAMAKI: 70

SIKHATSI: Ema-awa la-2

Leliphepha linemakhasi la-13.

TICONDZISO KULABAHLOLWAKO

1. Leliphepha lehlukaniswe TIGABA LETINTSATFU:

SIGABA A:	Sivisiso	(30)
SIGABA B:	Sifinyeto	(10)
SIGABA C:	Takhi netimiso tekusetjentiswa kwelulwimi	(30)
2. Fundza TONKHE ticondziso ngekucopehela.
3. Phendvula YONKHE imibuto ngeSiswati.
4. Cala LESO NALESO SIGABA ekhasini LELISHA.
5. Dwweba umugca emva kwaleso naleso sigaba.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Shiya umugca emkhatsini wetimphendvulo takho.
8. Caphelisisa sipelingi/lupelomagama nendlela lewakha ngayo imisho.
9. Siphakamiso sekulawulwa kwesikhatsi:

SIGABA A:	Lokungenani emaminithi la-50.
SIGABA B:	Lokungenani emaminithi la-30.
SIGABA C:	Lokungenani emaminithi la-40.
10. Bhala ngebunono nangesandla lesifundzekako.

SIGABA A: SIVISISO**UMBUTO 1**

1.1 Fundza letheksthi bese uphendvula imibuto lelandzelako.

ITHEKSTHI A**TITOKIFELI**

- | | | |
|---|--|----------------|
| 1 | Indzaba lesematseni nguleyo yetitokifeli. Ivakele ngesheya kwetilwandle, yenabela emaveni labomakhelwane yate yefika nakuleli leNingizimu Afrika. Ekucaleni ibukeke shengatsi ingumdlalo, kucatjangwa kutsi kuyintfo yalabangakafundzi kantsi bakhe phasi kwabhunya lutfuli. Bantfu babonile kutsi zukana labanaye akatenetisi tidzingo tabo nekutsi imphilo kuletinsuku imba ecolo, ivitsita likhikhi lemuntfu libhoboke lisale likhamisile, kuphephe labo labanengcondvo lekhaliphile yekonga imali. Bacala kuyibuka ngalamanye emehlo indzaba yetitokifeli, batibandzakanya kuto. | 5 |
| 2 | Kubonakele kutsi kunyenti lokuzuzwako ngekungenela tinhlango tetitokifeli, akukakhatsaleki kutsi umusha nobe sewumdzala. Phela imali idzingwa nguwonkhewonkhe. Lelive likhungetfwe simo lesibucayi. Kubita kutsi nguloyo naloyo aticabangele tindlela tekutiphilisa. Iphelile indzaba yekubukelela kuphiwa kute ucoshe indlala. Titokifeli tisite bantfu labanyenti, tabetfula umtfwalo kutetimali. Tiyindlela yekonga imali lapho emalunga enhlango avumelana khona kukhokha imali lebekiwe ebhange ngelusuku nesikhatsi lesimisiwe. | 10
15 |
| 3 | ENingizimu Afrika kutfolakele kutsi bantfu labanyenti bayehluleka kuhlangabetana netidzingo temphilo letifaka ekhatsi kudla, luphahla lwekufihla inhloko, timphahla nemfundvo imbala. Nanobe hulumende etama ngalokusemandleni kwenyula labo lababukana nalesimo semphilo kepha kuvele kube lite ngobe likhuphuka njalo linani lalabalala bangakadli. Titokifeli tisungulwe njengendlela yekusita bantfu kulokuncane labanako, kakhulu nakuvela timo letimatima. | 20 |
| 4 | Kunetinhlobonhlobo letinyenti tetitokifeli kuleli. Kukhona titokifeli tekonga imali kwesikhashana, bomasingcwabisane, kubekela likusasa imali nekongela kutsenga intfo lenkhulu lebitako. Bantfu labanyenti bangenela titokifeli tekonga imali kwesikhashana ngobe umjikeleto wekutfola imali awutsatsi sikhatsi lesidze njengobe ukhetfwa ngemalunga kute uhambisane netidzingo tawo. Lomasontfo, lovetwe ephaphabukwini i-Move 2020, utsi sitokifeli sabo sacala ngemnyaka we-1980. Linyenti lemalinga bantfu labasebasha. Sinemalunga lalishumi. Lilunga ngalinye likhokha R2 000 ngenyanga. Utsi njalo ngenyanga yeNgongoni emalunga ayatikhipha kuyewushaywa ngumoya imphelasontfo yinye. Kulomnyaka loyetulu bahlele kuya eKruger National Park kuyewutikhokha ngekubona tilwane. | 25
30
35 |


- 5 Inhlango yabo, iTsembalefu, ihlangana njalo ngeMgcibelo wekucala enyangueni. Inhloso yekuhlangana kuba kugcugcutelana ngemphilo, kwelulekana ngetinkinga, kukhutsatana nangekuchubekela embili ngemfundvo. Lomunye wabo usandza kwetfweswa ticu tebudokotela kantsi lomunye ukhushulelwe esikhundleni sekuba nguthishelanhloko. Kuhlonyiswana nangemakhono ekutfunga, kuhlobisa indlu nekupheka. Nangabe lomunye kulenhlango abukana nenkinga yetimali, uyabhadalwa ngaleyo nyanga. Nangabe kunekuhishana, inkinga kubukwana nayo isaveta inhloko isonjululwe. Ngenhlanhla lelinye lalamalunga linguSonhlalakahle. Inhlango yabo ibuswa lutsandvo nekuhloniphana nobe ngabe umuntfu ungakanani. Emalunga lasafundza sikolo agcugcutelwa kakhulu kutsi imali layitfolako atsenge lokutsite akutsengise kute atfole inzuzo aphindze abekele nelikusasa. 40
- 6 Titokifeli letinyenti tivamise kudlalwa bantfu labatinsika temakhaya, kakhulukati labasikati kwengeta imali lencane labayitfolako. Utsi lomunye lemali iyasita kakhulu nakuvulwa tikolo. Kubhadalwa tindleko tesikolo, kutsengwa umfaniswano nekubhalisela labaya emanyuvesi. Utsi ugcugcutelwe ngulabanye labasikati lababona etinkhundleni tekuchumana bababata titokifeli. Lokukhulunywe nabo ngebuhle bekungenela titokifeli bavete kutsi tibasita kakhulu kutsi babukane netidzingo tabo. Uma batsenge kudla ekupheleni kwenyanga, kutsatsa sikhatsi lesidze kutsi kuphele. Bavete nekutsi tiyasita ekutseni ungalindzi kutsi uphiwe shengatsi ulizini lenyoni. 50
- 7 **Kuhlala ukhatsatekile emoyeni kuyancipha kwandze injabulo, lubanjiswano, inhlalo lenhle,** budlelwano nekuphumula emsebenzini nasemabhukwini kulabo labasafundza sikolo. Liyancipha nelizinga labaphilela kuboleka kubomashonisa njengobe kuvetwa kanyenti kutsi labasebentako labaphilela bomashonisa, emakhadi abo asebhange ahlala kulabomashonisa. Loku kuyintfo lembi. 60
- 8 Imphumelelo yato tonkhe titokifeli isekwetsembaneni. Inkinga ivela lapho imali seyibolekwa umuntfu longaketsembeki. Kuvuka timphi, kujikiswane nasemaphoyiseni, igcine naleyo mali ingasatfolakali. Ngekungetsembeki, lamanye emalunga agcina asayekele, angenele letinye tinhlango ngenca yekungasatfoli konkhe lebekuvunyelenwe ngako. Kuletinye titokifeli lilunga lelingaketsembeki ligcina lihlaselwa, kutsatfwe yonkhe imphahla yasendlini, indlu isale ingenalutfo. Kubalulekile kakhulu kutsi titokifeli tibe netinchubomgomo letivikela kudleka kwetimali budlabha. Leto tinchubomgomo atibe nesingcivito sasemaphoyiseni. 70
- 9 Titokifeli tidlala indzima lenkhulu emphilweni kakhulukati nawehluleka kusebentisa kahle imali nobe nangabe imali lonayo iyincane kakhulu. Bantfu labasebasha bayakhutsatwa kutsi bahlanganyele kuletinhlangano ngobe ngibo kanye labangenawo emakhono ekusebentisa kahle imali. Abeneliswa, bagcina bangene ngemkhono nangesiphanga kubomashonisa. Labo labatfola imali yesondlo sahumende nabo bayakhutsatwa kakhulu kutsi basukume batisungulele tinhlango tetitokifeli kuhlangabeta loko lokuncane labakutfolako. Titawubasita kucongelela netintfo letinyenti letisidzingo lesikhulu emphilweni. Siswati sitsi kubamba letingelako. 75

[Move, Imphala 2020]

- 1.1.1 Bhala KUBILI lokugcugcutele bantfu kutsi babone kubaluleka kwekungenela titokifeli. (2)
- 1.1.2 Khetsa YINYE imphendvulo. Isho kutsini lenkhulumo lelandzelako? Kumba ecole. Tintfo ... kakhulu. (2)
- A setisindza
B setimatima
C setibita
D setilukhuni (1)
- 1.1.3 Tibasita njani titokifeli bantfu nawufundza indzima yesibili? (1)
- 1.1.4 Chaza umehluko lokhona kuloko lokushiwo ngulomugca locindzetelwe endzimeni yesibili naloko hulumende lakwentela bantfu labadzala lesebakhulile. (2)
- 1.1.5 Kunamphumela muni lomuhle lokuhlangana kwemalunga etinhlango tetitokifeli nawufundza endzimeni yesihlanu? Bhala KUBILI. (2)
- 1.1.6 Nawufundzisisa letheksthi, ngabe emalunga lasafundza sikolo, ayisebentisa ngendlela lefanele yini lemali layitfolo kuletitokifeli? Sekela imphendvulo yakho? (2)
- 1.1.7 Kulesikhatsi salomuhla titokifeli tivamise kudlalwa bomake. Kubangelwa yini loko? Bhala KUBILI. (2)
- 1.1.8 Ngutiphi tinkinga letibangwa kuhlala sikhatsi lesidze emalunga angahlukaniselani leyo mali lesuke ibekiwe? (2)
- 1.1.9 Ucabanga kutsi yini lesatjwa bantfu kutsi bangangeneli titokifeli tesikhatsi lesidze bakhethse kungenela tesikhashana? (2)
- 1.1.10 Ngemvakwekufundza letheksthi lekhuluma ngetitokifeli, ungatibandzakanya yini kuto? Sekela imphendvulo yakho. (2)
- 1.1.11 Phawula ngalokujulile kutsi Litiko Letetimali tahulumende lilahlekelwa njani ngalesento sekubeka nekubolekana timali emakhaya? (2)

1.2 Fundza lesibonwa bese uphendvula imibuto lelandzelako.

ITHEKSTHI B



[Itsetfwe: alarmy pictures.com]

- 1.2.1 Imvamisa uma kukhulunywa ngemali, umuntfu ente loku lokwentiwa ngulomuntfu loseFREYIMINI ye-1, usuke asho kutsini? (1)
- 1.2.2 Tfola imbangela yekutsi bantfu basemimangweni batfolakale bakulesimo lesifana nalesalomuntfu loseFREYIMINI ye-1. (1)
- 1.2.3 Bacinisekisa njani labaseFREYIMINI ye-2 kutsi lilunga likhiphe malini ngenyanga? Bhala KUBILI. (2)
- 1.2.4 Uyavumelana yini nekutsi labanye bantfu abayijabuleli lendlela yekubhanga imali leseFREYIMINI ye-3? Sekela imphendvulo yakho. (2)
- 1.2.5 Bhala umehluko lokhona emkhatsini walokwenteka emgceci logcanyisiwe endzimeni ye-4 lekutheksthi A naloko lokwenteka eFREYIMINI ye-2 kutheksthi B. (2)
- 1.2.6 Ngubuphi buhle lobuletfwa titokifeli nawufundza umugca locindzetelwe endzimeni ye-7 kutheksthi A neFREYIMU ye-4 kutheksthi B? Nika KUBILI. (2)

SAMBA SESIGABA A: 30

SIGABA B: SIFINYETO**UMBUTO 2**

Fundza letheksthi lelandzelako bese uyayifinyeta ngewakho emagama la-80. Sifinyeto sakho asivete **emaphuzu lasikhombisa lakhombisa kutsi bafundzi bayahlukunyetwa etikolweni.**

CAPHELA

1. Sifinyeto sakho asibe ngendlela yetindzima (emapharagrafu).
2. Akukadzingeki kutsi ubhale sihloko.
3. Khombisa linani lemagama lowasebentisile ekugcineni kwesifinyeto sakho.

ITHEKSTHI C**KUHLUKUNYETWA KWEBAFUNDZI ETIKOLWENI**

Sekuvakele kanyentana emisakatweni, kubomabonakudze nasemaphephandzabeni ngemibiko lemayelana nekuhlukunyetwa kwebafundzi etikolweni. Bafundzi bahlukunyetwa emoyeni, emtimbeni nasengcondvweni. Labanye bahlukunyetwa bontsanga, labanye bahlukunyetwa bothishela. Kutsiwa lemibiko seyifinyelele nasetindlebeni teNdvuna yeLitiko Letemfundvo Lesisekelo, ngendlela kuhlukunyetwa kwebafundzi sekwandze ngayo. INdvuna ikhutsate bafundzi kutsi babokhuluma uma kukhona lokungahambi kahle.

Ubuye wengeta ngekutsi labo labahlukubeta labafundzi bakwenta ekusitsekene khona bangetwubonwa ngumuntfu. Batali nabo kufanele babone uma sekuneluntjintjo ebantfwaneni babo. Bafundzi kumele babike nangabe kukhona lokubi lokwenteka kubo. Lokuhlukunyetwa kwenteka etikolweni nangaphandle kwemabala etikolo. Tinyenti timpawu letikhombisa kutsi umfundzi uyahlukunyetwa. Bafundzi labahlukunyetwako babonakala ngekutsi bangasafuni kuya esikolweni kantsi ekucaleni bebakujabulela.

Etikolweni kunemidlalo leminyenti lapho nguloyo naloyo mfundzi atikhetsela umdlalo lawutsandzako. Labo labangenawo emakhono ekudlala leyo midlalo, baba yinhlekisa kulabanye. Imidlalo lefaka ekhatsi ibhola yetinyawo. Bafundzi labatehluleki babitwa ngekutsi batinkhomo. Bafundzi lababitwa ngalawo magama babonakala ngekutsi bangabe basadlala leyo midlalo ngobe besaba kuhlekwa.

Emalanga ekuya esikolweni asihlanu. Utfola bantfwana bajabula uma kuyimphelasontfo, bantjintje bangasajabuli uma sekuLisontfo ngobe ngakusasa kumele baye esikolweni bayohlangana nalabo lababahlukumetako. Phela kuleto tigitjelwa kubakhona labahlukumeta labo labacala kugibela. Labo bafundzi bagcina bacela kuhanjiswa batali babo etikolweni kunekuhamba ngaletigitjelwa. Etifundvweni letinyenti kuba netikhatsi lapho bafundzi betfula imisebenti labayentile. Labo labahlakaniphile bashayelwa lihlobo netinkhwela bahalaliselwe. Labanemahloni bayahlekwa bagcine bangasafuni kwetfula leyo misebenti. Bothishela bagcine babatsatsa shengatsi batedzeleli kantsi ngulokuhlukunyetwa.

Bafundzi labahlukunyetwe kakhulu bafikelwa kucasuka ngekushesha bese bachukuluta labanye bantfwana. Batali babonakala babitwa emahlandla lamanyenti kutewugwetjwa emacala alabo bantfwana. Kulabanye bafundzi kuvuka kugula lokungekho uma kumele baye etikolweni. Bothishela ababukisise indlela bafundzi labatiphatsa ngayo ngobe ngalesinye sikhatsi lokutiphatsa kabi kwebafundzi kubangwa kuhlukunyetwa.

Batali nabo ababe yincenye yemphilo ebantfwaneni, babasondzete edvute kute bakhone kubavulela tifuba ngalokubahluphako. Uma simo sekuhlukunyetwa singasalawuleki, bakhona beluleki labanganelela ekusiteni labantfwana.

[Itsetfwe: /LANGA, 2022]

SAMBA SESIGABA B: 10

SIGABA C: TAKHI NETIMISO TEKUSETJENTISWA KWELULWIMI**UMBUTO 3: ISIKHANGISI**

Fundza lesikhangisi bese uphendvula imibuto lelandzelako.

ITHEKSTHI D**SENTA LUSUKU LWAKHO LUHAMBISANE NESIKHATSISI!****Unemcimbi welukhetselo?**

IGubhanatsi Décor ayinamona!

1. Kusishayela nje, sisemnyango wakho.
2. Lusuku lwakho luba ngundzabamlonyeni.
3. Umcimbi wakho udvonsa tintsatseli tingakabitwa, uvetwe kumabonakudze.
4. Lowetfu umhlobiso uhamba nelikhekhe embili.

**GUBHANATSI DÉCOR****UKHUMBULE!**

Ubhadala sibambiso (Idiphozi) lesingabuyiselwa emuva.

Libhange: SIYATFUTUKA
I-akhawunti: 055 773 3447
Ikhodi: 02025

**SENTA LOKU:**

- Kuhlobisa.
- Kupheka.
- Kutsatsa titfombe.

Kusukela ngemnyaka we-1960.



[Itsetfwe: <http://www.kingfeatures.com>]

3.1 Nika KUNYE lokwenta kutsiwe lesicubulo salelisikhangisi sibhaleke kahle. (1)

3.2 Nika mcondvofana weligama lelicindzetelwe kulomusho lolandzelako.

IGubhanatsi Décor **ayinamona!**

Khetsa YINYE imphendvulo lengiyo kuletilandzelako:


- A IGubhanatsi Décor ayinalubandlululo!
- B IGubhanatsi Décor ayinamaphosiso!
- C IGubhanatsi Décor ayinamhobholo!
- D IGubhanatsi Décor ayinankohliso!

(1)

- 3.3 Emshweni lokunombolo 3, kunelibintana lemagama lanesinongo sekumuntfutisa. Bhala lelo bintana lalamagama. (1)
- 3.4 Khokha umusho lokhomba kutsi labomakadzebona bebakhangisi banelwati lolwanele kulelibhizinisi labo. (1)
- 3.5 Bhala KUBILI lokungenta batsengi babe nebumatima bekufika kulelibhizinisi lakaGubhanatsi Décor. (2)
- 3.6 Kungumbono nobe kuliciniso yini kutsi lelibhizinisi angeke liwe kalula? Sekela imphendvulo yakho. (2)
- 3.7 Bakhangisi bakaGubhanatsi basebentise lisu lini ngalomusho lokunombolo ye-4 kute emakhasimende agijimele kubo ashiye labanye? Sekela imphendvulo yakho. (2)
- [10]**

UMBUTO 4: IKHATHUNI

Fundza lekhathuni bese uphendvula imibuto lelandzelako.

ITHESKTHI E

[Itsetfwe: <http://www.americanprogress.org/cartoon/>]

- 4.1 Khokha umusho losefreyimini yekucala lokhombisa kutsi lomsebenti walomnumzane lokulekhathuni uyamesaba. (1)
- 4.2 Loluphawu lolusedvute nemlomo walomuntfu lobophe thayi losefreyimini ye-1, lusitjela kutsi wentani? (1)
- 4.3 Phindza ubhale lomusho lolandzelako bese ufaka sifinyeto kuleligama lelicindzetelwe.
- Mnumzane**, kuyawutsi kusa kusasa wonkhe umsebenti utawube usetafuleni lakho. (1)
- 4.4 Kufulatsela nekufaka tandla emakhikhini kwalomuntfu losefreyimini ye-2 kukhombani? Nika KUNYE. (1)
- 4.5 Khokha umusho lonesabitanibhanca losefreyimini ye-3 uwubhale phasi. (1)
- 4.6 Yakha umusho ngeligama lelidvwetjelwe efreyimini ye-3 livete mcondvosobala. (1)
- 4.7 Loluhlobo lwenkhulumo lolucindzetelwe efreyimini ye-3 lukhombisa emandla ekuphatsa. Chaza. (2)
- 4.8 Utsini umbono wakho ngalengkulumo letsi, 'Vele lokusebenta nebantfu labasebasha kuyahlupha?' Sekela imphendvulo yakho. (2)

[10]

UMBUTO 5

Fundza lethekesthi bese uphendvula imibuto lelandzelako.

ITHEKSTHI F**IMIBONO NETELULEKO**

Kulalela imibono neteluleko letinhle kuyaphumelelisana. Ungakhononi nawelulekwa nobe usolwa ngalokutsite. Tsatsa imibono yalabanye futsi ungabuki neminyaka yalabo labakwelulekako. Bantwana labancane nabo banelwati lolujulile. Budvodza abukhulelwa. Kunebantfu losondzelene nabo labaphumelele kulentfo lofuna kuba ngiyo emphilweni yakho. Bavakashele ubuye utihlanganise nabo. **Utawutfole lwati 5**
loluncono lelitawutfufukisa imphilo yakho. Sihlalandzawonye sidla emajwabu.

Likusasa nemphumelelo kusetandleni takho, kepha uyadzinga kwelulekwa nekuboniswa ngulabanye bantfu, kakhulukati labangebatali nawufuna kubukwa ngulabaphasi. Kuvamile-ke kutsi uve labasha sebatsi, 'Besingekho ebuncaneni benu.' Labadzala bayasho kutsi indlela ibutwa kulabasembili kantsi salakutjelwa sibona ngemopho. 10

Kuhle kutehlisa nobe ungubabe uhlale esigicini nakukhulunywa nawe. Ihlonipha nalapho ingeyuwenzela khona. Umuntfu ngumuntfu ngebantfu. Udzinga bantfu edvute nawe awutidzingi wena wedvwa. Ngisho nobe unako konkhe kepha uyamdzinga umuntfu eceleni kwakho njengasetikhatsini letimatima. Yakha likusasa lakho 15
ngemibono lemihle neteluleko letinhle utewuphumelela.

[Itsetfwe: *Khanyisa Weekly*, Ingongoni 2021]

5.1 Lomusho lolandzelako unesento lesisendleleni lesalibito, wubhale phasi bese uyasidwebela.

Kulalela imibono lemihle neteluleko letinhle kuyaphumelelisana. (1)

5.2 Kulomusho lolandzelako, sebentisa siphawulo njengesabito.

Bantwana labancane nabo banelwati lolujulile. (1)

5.3 Lungisa liphutsa lelulwimi lelisemshweni locindzetelwe endzimeni yekucala.

Khetsa imphendvulo lengiyo kuletilandzelako:

Utawutfole lwati ... imphilo yakho.

- A lelincono lolutawutfufukisa
- B lelincono lelitawutfufukisa
- C loluncono lelutawutfufukisa
- D loluncono lolutawutfufukisa

(1)

5.4 Khokha saga lesisendzimeni yekucala lesichaza kutsi kuvilapha akuholelani. (1)

- 5.5 Tsatsa inkhulumonkholelo lesenzimani yesibili wakhe ngayo umusho. (2)
- 5.6 Bhala lomusho bese ugucula lenkhulumo lelandzelako ibe yinkhulumombiko.
Kuvamile-ke kutsi uve labasha sebatsi, 'Besingekho ebuncaneni benu.' (2)
- 5.7 Faka libintana lelingena egameni lelisetibiyelweni kulomusho lolandzelako.
Kuhle kutehlisa nobe ungubabe uhlale (esigicini) nakukhulunywa nawe. (2)
[10]

SAMBA SESIGABA C: 30
SAMBA SAKO KONKHE: 70